

CBETA電子佛典集成

CBETA Chinese Electronic Tripitaka Collection
eBook

T19n1015

佛說阿難陀目佉尼 呵離陀隣尼經

元魏 佛馱扇多譯

目次

- [編輯說明](#)
- [章節目次](#)
- [卷目次](#)
 - .001,
- [贊助資訊](#)

編輯說明

- 本電子書以「CBETA 電子佛典集成 Ver si on 2023 .Q4」為資料來源。
- 漢字呈現以 Uni code 3.0 為基礎，不在此範圍的字則採用組字式表達。
- 梵文悉曇字及蘭札字均採用羅馬轉寫字，如無轉寫字則提供字型圖檔。
- CBETA 對底本所做的修訂用字以紅色字元表示。
- 若有發現任何問題，歡迎來函 service@cbeta.org 回報。
- 版權所有，歡迎自由流通，但禁止營利使用。

聞如是：

一時佛遊於維耶離大叢樹間，有精舍名交露莊嚴，與大比丘眾三十萬人俱。時佛欲放軀命，自期三月當般涅槃。爾時佛告賢者摩訶目犍連，令到三千大千國土，盡呼其中聲聞、辟支佛種及發摩訶衍者皆使來會。目犍連即時受教，稽首佛足作禮而去，自以功德便一舉足蹈須彌頂，承佛威神即坐思惟：「當作何三昧令三千世界聞我請音？」應時三昧尋如所念，十方一切遍聞其聲。時有百萬比丘來會精舍。賢者舍利弗復發念言：「我亦當三昧，欲知閻浮利內比丘所在遠近令聚。」則如所念應亦皆集及知處所。時有四十萬比丘來會精舍。佛復告不現相菩薩、軟首菩薩、棄諸勤苦菩薩、出一切憂冥菩薩、除一切蓋菩薩、一切尊自在菩薩、其音廣聞遍見普安菩薩、眾香手菩薩、一語報萬億音菩薩、慈氏菩薩等：「善男子！汝去到十方如恒沙等諸佛國土，盡呼其中發菩薩意、已得阿惟越致及未得者、已得無所從生法忍及未得者，皆令來會交露精舍。」十菩薩等各受佛教稽首而去，遍到十方恒沙國土。爾時八十億百千一生補處菩薩來會，億百千阿惟越致菩薩來會，三十億得無所從生法忍菩薩來會，六十億淨意解脫菩薩來會，初發大意及應法作者不可計數，悉皆一類持佛威神，各從十方飛來到此，為佛作禮都會共坐。時舍利弗見菩薩眾品第差異所住不同，而一等類俱飛來會，即驚怖言：「將佛功德神力所致，用何等故來會如是？」於是舍利弗即起離坐，為佛作禮，長跪叉手白佛言：「我所疑怪，今欲問佛，使會菩薩令得直信，聞佛所說各得其所，恒沙等佛所說經法當令一切皆平等聞及得清淨，令無數人種種所問皆能報答。行何法行常不失意，疾得無上平等之道最正覺乎？」

佛言：「善哉善哉！舍利弗！乃為諸菩薩摩訶薩故欲問其義，快如是乎。」佛言：「諦聽，善持思之，吾當為汝深加解脫，令一切聞疾得無上平等之道最正覺也。」佛語舍利弗：「是菩薩等已得應此陀隣尼卷，已照明諸法，悉為一切諸法作導。所以者何？用世間人故也。」

佛語舍利弗：「菩薩有四事，用得是法。何等為四？一者身所行常謹勅、二者口所言常至誠、三者意所念常柔順、四者善權方便救護一切。是為四事用得是法也。」

佛語舍利弗：「菩薩復有四事，得不可盡空身慧。何等為四？一者以清淨住燒諸勤苦、解散疑垢，度脫一切世間人民；二者以清淨住持諸經法導利一切；三者以清淨住所作功德饒益一切；四者淨諸國土過度一切使得佛法。是為四事，空身淨住慧不可盡也。」

佛語舍利弗：「菩薩復有四事，持陀隣尼目佉用入生死令疾逮得。何等為四？一者陀隣尼目佉因世名色使疾得淨法、二者陀隣尼目佉入其忍辱、三者陀隣尼目佉悉入一切思想之根、四者陀隣尼目佉入一切所為善惡之法使疾逮得。是為四事，疾逮得此陀隣尼目佉也。」佛言：「菩薩其欲逮得阿難陀目佉尼訶離陀隣尼，當先曉覺四十八名。何等四十八？」

「阿歧(無為) 默歧(不為) 三曼陀目歧(普門) 悉提(精勤) 尼律提(寂滅) 波羅揲(照光) 伊隸(順教) 劫卑(常念) 劫般陀離(所念) 沙離(妙術) 沙羅颯離(妙句) 嘻羅(有心) 嘻隸(無意) 嘻栗隸(心無所念) 梅提(解脫) 遮羅泥(行者) 頗遮泥(無動) 阿蘭泥(他餘) 涅勿提(無脫) 涅誓提(無生) 尼阿羅揲末離(無垢行) 輸他泥(嚴淨) 波羅訖陀颯泥(無往) 暴披揲之兮(名聞) 阿霜祇(離有) 曇彌(無礙) 維弗羅佉揲(調定) 僧揭棧(長光明) 姪提離(甚勇) 摩訶姪提離(大勇) 夜蛇披提(嗟歎句) 頰遮離(不可動) 末遮離(不動) 三末遮離(等動) 提羅刪提(次堅) 羞絺提(諦往) 阿霜迦揲訶離(無礙行) 三曼陀目歧(普尊) 尼訶羅述提(精勤行) 須彌(須彌) 耽披颯提(住遮) 毘羅[序-予+單]彌(堅強力) [序-予+單]摩颯提(得強力) 摩訶佉揲子(大光明) 揲富羅賴彌(長照明) 薩和呂菟揭提(生所護) 阿那叱祇(無斷) 陀隣尼目佉貳那提(無有)。」

「現在佛所說如是神呪四十八名。」

佛告舍利弗：「菩薩當念陀隣尼如是，若脫法若不脫法、不作是作、亦不知亦不了，於其中不有所增亦無所減、亦不見脫亦不見不脫、亦不見起亦不見滅、亦不見當來過去今現在、亦不見來亦不見去，亦不求佛亦不轉意亦不相好、亦不種好亦不眷屬，亦不有戒、亦不三昧、亦不智慧、亦不解脫、亦不見解脫慧，亦不坐行亦不無所得亦不垢除、亦不慧亦不無慧、亦不教授亦不淨一切、亦不有我亦不有人、亦不為法亦不精進、亦不行亦不清淨、亦不身亦不心亦不口、亦不當來亦不過去亦不今現在、亦不自為身亦不為他人身。如是舍利弗！是法名一切法中無上最法，亦撿斂諸法，亦入一切法中，是名為念諸佛法。是陀隣尼名法之猛，略聚一切法。是名明解章品，淨一切人滿足諸願，令得名聞覺意三昧。是名悉自成本功德，是名法種積藏，發諸意根令甚尊重，相好嚴莊無能動者。若天魔來亦不能壞，無能奪者、無能近者。如是舍利弗、其有菩薩聞是阿難陀目佉尼訶離陀隣尼，為已得阿惟越致及無上平等之道。何以

故？於是諸佛所行皆已具足，為一切作行，破壞五道生死及諸疑結，使疾得陀隣尼也。」佛爾時說偈言：

「莫作念言空法， 莫輕言得不得，
直信法莫中疑， 則疾得陀隣尼。
恐為是空所縛， 分別空得佛疾，
是要慧無崖底， 速得近陀隣尼。
菩薩持陀隣尼， 為總攝諸法則，
聞十方佛道教， 及智慧皆悉得。
了尼呵陀隣尼， 譬如日大光明，
受諸佛名決法， 淨受持得法解。
此日佉陀隣尼， 諸所有現在前，
於諸法最為上， 悉等護世間人。
令十方人非人， 一劫中問慧義，
應悉為解所疑， 其劫竟智不盡。
若受信於經道， 精進持中正法，
近一生補其處， 即得為法王子。
若持是陀隣尼， 則為哀一切人，
名聲遍閻浮利， 為世尊所稱譽。
其有持是經者， 臨壽終皆悉見，
八十億拘利佛， 申手授生尊處。
有學是陀隣尼， 千億萬劫數中，
所作罪惡邪冥， 一月中皆滅盡。
若菩薩作福施， 萬億劫不懈倦，
不如學陀隣尼， 一月中德停等。
具受說陀隣尼， 悉得諸三昧慧，
已得意不復轉， 當得佛有國土。
有供事是經者， 使三界作魔行，
欲嬈亂壞其意， 終不能動搖是。
一切空得曉了， 用是生無數佛，
如是語無有異， 陀隣尼不可盡。
於是處聞是事， 提想竭授我決，
如恒沙數等佛， 於其時便悉見。
諦奉持是經卷， 一切願皆疾得，
入諸佛國土法， 隨所宜能化度。
常清淨諸佛國， 於眾僧無瑕穢，
問名深幽妙法， 是經卷悉能知。
於婬逸皆已無， 於思惟有七覺，

八十億諸佛等， 陀隣尼悉持與。
常止心莫念非， 不當念慎莫念，
如是念莫不念， 後得德不可量。
常當了是經事， 慎莫令有狐疑，
如人行入大海， 終不言寶難得。
受福德天人樂， 如是事終不遠，
亦當疾速得佛， 以是故念莫離。」

佛告舍利弗：「菩薩有四事行，疾得陀隣尼法。何等為四？一者遠離世間愛欲；二者不說他人長短人亦不得其便；三者有所來索不逆人意，無所愛惜，與後不悔；四者晝夜精進常志求諸法。是為四事。舍利弗！菩薩行是，疾得陀隣尼。」佛爾時說偈言：

「遠眾惡離色欲， 作罪行墮地獄，
無三毒災不生， 捐所愛得是經。
不嫉妬於他人， 不自歎其族親，
常等心於一切， 於身體大端正。
常捐棄身所樂， 於世間無瞋諍，
不與人共從事， 便速近陀隣尼。
於晨夜常精學， 於外道無所冀，
當作是求上法， 陀隣尼自然現。」

佛語舍利弗：「菩薩有四事行，疾速得是陀隣尼。何等為四？一者獨在空閑處、二者住深法忍、三者若有饋遺不以喜、四者不愛惜軀命何況財寶，是為四事。舍利弗！菩薩行是，疾速得陀隣尼。」佛爾時說偈言：

「在空閑念正法， 不輕慢於他人，
生死境如戴火， 得人身當作行。
常持意在深忍， 於財寶足而已，
坐宗室起等意， 不偏厚其種姓。
但供養佛與法， 住善力越世難，
即毀形下鬚髮， 便得德入微妙。
當知空及世事， 以是故棄所有，
愚行者貪財利， 無戒忍及智慧。」

佛語舍利弗：「菩薩復有四事行，疾得是陀隣尼。何等為四？一者有八品字，開入智慧解點中。何等為八？一名為波，以一切著法使

入空法中。二名為羅，如來若現相好不現相好，以法身入諸法中。三名為婆，若癡法黠法，使人解慧法中。四名為迦，知諸殃罪所歸趣，使人功德福中。五名為闍，知生老病死，即於是入無色中。六名為陀，視諸地世間皆空不驚怪，入無願中。七名為舍，休息諸法，使人清涼法中。八名為叉，知一切法空。是為八。復有四事：一者常思念八品字、二者若書是經當諦書之、三者若持是經當諦持之讀至十五日、四者當如法行念八品字。是為四事。舍利弗！菩薩用是行，疾得陀隣尼。」佛爾時說偈言：

「常當念八品字， 書持卷諦奉行，
十五日讀莫離， 勸一切求佛道。
要當學開化人， 得智慧疾近佛，
悉遍見十方佛， 皆為現在前立。」

佛語舍利弗：「菩薩復有四事，念陀隣尼得法利。何等為四？一者常為十方佛世尊所念、二者所作為魔不能壞其意、三者宿命諸罪皆為消盡、四者初不斷至誠之說諸所問皆能發遣。是為四事，舍利弗！菩薩得陀隣尼法利。佛爾時而說偈言：

「為諸佛常所念， 魔不能得其便，
所作罪即消滅， 為一切解所疑。」

佛語舍利弗：「過去久遠世所經劫無央數，復倍無數長遠難極不可復計劫，爾時世有佛，號寶具足有德行王如來，過四道不受平等覺，安定於天上，號天中天，其佛為一切說法無能過者。臨般涅槃，時有金輪王名曰陀樓，主四天下。其子字無念。名聞具足。年十六歲。是時太子行到佛所。聞彼佛說陀隣尼經。聞已歡喜即得是經。得已諷學常念奉持，精進不睡脇不在席七千歲，不念愛欲七千歲，不念財寶七千歲，不問他事七千歲，常獨處止意不傾動七千歲。爾時皆聞九十九億不可計佛說智慧法，聞已便棄國捐王行作沙門，九萬九千歲奉行阿難陀目佉尼呵離陀隣尼，復為一切說。在一世中教化世間人民，令八十億萬那術人皆使發無上平等道意，逮得阿惟越致。時復有長者子名月英，於大眾中聞是陀隣尼，聞已勸助持。是勸助歡喜福德，到九十萬億佛剎供養諸佛成立功德，於爾所佛國皆得諸陀隣尼，即逮得一生補處，作飛行菩薩。佛語諸菩薩：『於是三劫中供養爾所佛，過三劫已當逮得無上平等之道最正覺。』爾時長者子月英者，即提想竭佛是也。王陀樓子無念名聞具足者，即阿彌陀佛是也。」佛語舍利弗：「我於毘陀劫中，與諸菩

薩說陀隣尼，其聞是經有代歡喜、用勸一切者，其所施作以勸助福，超越四十萬劫不復勤苦，後當得道自恣其意。如復供養九千萬億佛已，當得無上平等之道最正覺也。」

佛語舍利弗：「若有菩薩最後得聞是陀隣尼，奉持勸助、代歡喜者，其德如是。若有菩薩因歡喜德，若以慈心為經墮淚衣毛起者，皆當速得無上平等之道，引著阿惟越致中。方便書、若持若學、若諷若誦若讀，舍利弗！如是輩福不可量、不可稱、不可說，一切人民無能計、無能極者。」佛爾時說偈言：

「若聞已加勸助， 及書持諷誦讀，
諸天人計其德， 無能知福祐極。
所生處常見佛， 於深經得慧證，
堅持法無能動， 便疾得明解覺。
常定意不增減， 諦不失陀隣尼，
無色想立相好， 為世雄無有上。
長者子聞是經， 所生處識宿命，
常得見無數尊， 如所願即得佛。
若欲疾得佛者， 及速離於眾魔，
欲得百功德相， 常念是得不久。
如恒沙世尊刹， 滿其中珍寶施，
不如是書持者， 譬喻之適停等。」

佛語舍利弗：「若有菩薩持意念學陀隣尼時，有山名醯摩槃，有八鬼神止其中，常共擁護之，開人志意。何等八？一名勇強鬼神、二名照明十方鬼神、三名多所饒益鬼神、四名龍王大力鬼神、五名至誠行鬼神、六名能調不調鬼神、七名童男鬼神、八名快臂鬼神。是為八神名。若學是經欲令神來者，淨自洗沐著新衣服，當經行時常持慈意向諸一切，却乃端心讀陀隣尼。當從是經堅奉持之，則疾開解得智慧也，爾時鬼神即在前立。」

佛語舍利弗：「復有八菩薩在欲天上，常等護人民授與經道。何等八？一名照明十方天子、二名世明天子、三名智光天子、四名日光天子、五名上審天子、六名滿所願天子、七名星王天子、八名習行意天子。是為八天子名。常等護人民，勸念持是經者，令疾定意得陀隣尼。求是經者常當精志念陀隣尼教，一法奉行無虧經戒，所語至誠其行亦爾。常當孝順於諸尊者，視一切人如佛無異，諸所愛重不以輕心，常念反復即得善報，乃速深忍眼及得見無所從生法。」佛說經已，三十二恒沙等菩薩悉速得陀隣尼立不退轉地，六十億天子得無所從生法忍，三萬二千天與人發無上平等道意。爾時三千大

千國土為六種震動，雨於天花，箜篌樂器不鼓自鳴。時舍利弗前問佛言：「唯世尊！是名何經？云何奉行？」佛言舍利弗：「是經名阿難陀目佉尼呵離陀隣尼，疾使人民得一切智。」

佛說經已，舍利弗及十方無數菩薩，天與人、乾沓和、阿須羅及持世者，皆歡喜前稽首佛足，作禮而去。

佛說阿難陀目佉尼呵離陀隣尼經

[CBETA 贊助資訊](https://www.cbeta.org/donation/index.php)

[.\(https://www.cbeta.org/donation/index.php\)](https://www.cbeta.org/donation/index.php)

CBETA 成立於 1998 年，於 2023 年 8 月 7 日轉型成為基金會。成立多年來，一部部佛典在嚴謹控管中轉換為數位典藏，不只數量龐大，而且文字校訂精確可信，又加新式標點方便閱讀。「CBETA 電子佛典集成」不僅獲得國際學界的重視及肯定，也成為大眾廣為運用的公共資源，如此成果都是在廣大信眾及有識之士的支持下才得以實現。

對一個從事佛法志業的非營利團隊，能夠長期埋首理想、踏實耕耘是非常不容易的。如今，CBETA 運作經費日漸拮据，但「佛典集成」仍有許多未竟之功。因此，懇請大家慷慨解囊、熱情贊助，讓未來有更多更好的電子佛典。

您的捐款本會皆會開立收據，此收據可在年度中申報個人或企業的綜合所得稅減免。感恩諸位大德的善心善行，以及您為佛典電子化所做的一切貢獻。

信用卡線上捐款

本線上捐款與 netiCRM 及 NewbPay 藍新金流合作，資料傳送採用 SSL (Secure Socket Layer) 傳輸加密，讓您能夠安全安心地進行線上捐款動作。

不管您持有的是國內或國外卡，所有捐款最終將以新台幣結算，所以我們所開立的捐款收據也將以新台幣計。

線上刷卡支持定期定額與單筆捐款。(銀聯卡不支援定期定額)

[前往捐款](#)

劃撥捐款

郵政劃撥帳號：5 0 4 6 8 2 8 5

戶名：財團法人佛教電子佛典基金會

欲指定特殊用途者，請特別註明，我們會專款專用。

線上信用卡 / PayPal 捐款

PayPal 是一個跨國線上付款機制的公司，CBETA 引用其服務，提供網友能在線上使用信用卡或 PayPal 帳戶贊助 CBETA 。

PayPal is an online system of a global payment solution. CBETA uses its service to provide the uses to donate by using the credit cards or PayPal account to support the CBETA project .

相關收據開立事宜，由於付款幣別為美元，我們除了會依您所贊助之美元金額開立收據外，另我們會依捐款當日公告匯率開立台幣收據，此收據為國內正式合法報稅憑證。

Since the donation made is in US currency, hence all the receipts will be issued in the US dollars consequently. However for the domestic donators, a Chinese official receipt will also be made according to the foreign exchange rate for the purpose of tax deduction.

[線上信用卡 / PayPal 贊助](#)

支票捐款

支票抬頭請填寫「財團法人佛教電子佛典基金會」。

For donations by check, please write the check to
"Comprehensive Buddhist Electronic Text Archive
Foundation".
